

# Hóben Mishonero

Revista pa Yunan di Pastor - Union Karibe Hulandes— Aña 2022



Revista **HÓBEN MISHONERO** ta un reto i invitashon pa nos muchanan i hóbennan yu di pastor por ta yená ku Spiritu Santu for di edat yòn, pa nan tambe ta bosero pa Dios, unda ku nan ta, unda ku nan bai, siguiendo stapnan di nan Maestro Kristu Hesus.



## Kontenido:

- ☹️ “Abo i Bo Salú”
- 😊 “Bòrchi Di Propaganda Ku Ta Kana”
- ☹️ “Muchanan Predikadó”
- 😊 “Si Tin Boĭuntat, Tin Un Kaminda!”
- ☹️ “Lo Mi Muri Pa Bo!”
- 😊 “Blòki Di Konstrukshon Di Karakter”
- ☹️ “Lèsnan Ku Por Siña For Di Un Hòmber Kòrtiku”
- 😊 “Disiplina Den Un Kareda Di Distansia Largu”
- ☹️ “Sr. Kreador Su Mannan Maron Fiá”



**KADA MOVEMENTU NOS HASI RESPONDIENDO DIOS tin un efekto di ola**, ku ta toka famianan, bisifianan, amigunan, komunidad. Kreensia den Dios ta kambia nos lenguahe. Amor di Dios ta afektá relashonnan di tur dia. Speransa den Dios ta dreña den nos trabou. Tambe loke ta kontrali— inkredulidat, indiferensia, i desesperashon. Ningun di e movementunan i respuestanan aki, kreensianan i orashonnan, gestonan i búskeda, por keda será den e alma. Nan ta brota bin afó i ta traha historia. Si no ta asina, ta sospechá ku nan ta djis fantasia, òf mas pió ainda, hipokresia. (*Palabranan di Introdukshon na e buki di Filemon, vershon TM*)

Historia Bíbliko tin su kolekshon di santunan, i nos por siña e bon, e malu, e mahos for di kada un su bida, pero nos lo bai enfoká riba djis dos. Hende “komun” manera nos, ku nan diferente responsabilidatnan i yamada. Algun, hopi respetá mas despues, pero tòg nan tabata sernan humano ku nan debilidatnan i desafionan, ku nan beis i nan eskohonan, ku nan éksitonan i nan frakasonan, asta algun frakaso hopi malu!

**Abo ta luchando komo yu di pastor?** Tin biaha bo ta keda frustrá ku bo mes? Esaki ta algu normal. Nos tur sa pasa dor di esei, esnan yòn, esnan mas bieu, pastornan, nan kasá, nan yunan, otro hende su yunan... Manera e matutina ku mi a lesa a bisa: *“Intenshonalmente Dios ta guia hende na frakaso. El a pone nos nase komo mucha chikí ku no por kana òf papia òf asta no sa kon usa wc korektamente. Mester siña nos tur kos. Tur e siñamentu ei ta tuma tempu, i El a traha nos asina nos lo dependé riba djE, riba nos mayornan, i un riba e otro. Tur kos ta traha asina pa nos purba i purba atrobe i atrobe te ora ku nos finalmente por hasié bon. I tur e tempu ei E tin masha hopi pasenshi mes ku nos.”* (Vanessa Pizzuto, *NO FEARS, NO CHAINS*, p. 66).

“Pero bo tin ku soportá, keda serka di Dios Su plannan pa bo por ta einan na e final primintí. No ta dura muchu mas awor, E ta riba kaminda; kualke ratu E por aparesé. Pero kualke hende ku ta den bon relashon ku Mi lo perseverá konfiando fielmente; si e kansa i kore bai, [Dios ta bisa], Mi no ta kontentu kuné. Pero nos no ta pèrdèdó ku ta laga kai. Oh, nò! Nos ta keda tene duru na djE i nos lo sobreviví, konfiando tur e kaminda” (Hebreonan 10:36-39, TM).

Ku amor,

*Anna Maria Manuela Croes*



# ABO I BO SALÚ



**Drumi suficiente.** Ora ku bo no drumi bon, bo ta kompensá dor di kome mas. Generalmente, esaki ta di e asina yamá kuminda basura. Sosegá suficiente i bo no tin mester di snèk pa keda lantá. Falta di soño ta pone bo bira tambe bieu mas lihé, anto bo no ke esei! ' 1

## ABO TIN PROBLEMA KU INSOMNIA?

Bo ta sinti soño? No ta bo so. Segun estadística, kualke dia, un den sinku adulto ta sufri di insuficiente kantidat di soño! Insomnia ta afektá mucha adolesente, adultonan i esnan mas bieu. I segun nos ta bira grandi, soño por bin skapa nos, asina ta hopi bon pa desaroyá bon hábito di drumi ora ta mas yòn. Esaki lo yuda mas despues den bida.

Hopi hende ta kere ku insomnia ta referí na falta total di soño. En realidat, e ta enserá vários problema di drumimentu, entre otro:

- Difikultat pa pega soño.
- Ta lant'ariba meimei di anochi i no por drumi mas.
- Ta lanta hopi tempran mainta.
- Ta drumi sin deskansá.

Mayoria hende mester di 7-9 ora di soño. Ora haña insuficiente soño esaki por:

- Kousa fatiga, iritabilidad, i kabes zonzá di soño durante dia.
- Pone bo subi di peso i ta duru pa baha bèk.
- Ta debilitá sistema inmün, i bo por bira malu mas lihé.
- Ta kousa preshon haltu di sanger i ta oumentá risiko di haña diabétis i malesa di kurason.

- Ta pone bo haña doló króniko.
- Ta provoká malesa mental, inkluyendo depresion i ansiedat.
- Ta mengua enfoke i konsentrashon, i ta baha bo prestashon na trabou.
- Ta baha funshon motor di kurpa, ku ta hasi stürmentu peligroso.

Remedi por ta bon pa algun kos. I siguramente algun produkto natural òf di yerba por yuda bo deskansá un poko. Pero resèpt di pildu pa drumi no ta semper e mihó solushon.

Desafortunadamente, algun remedi pa drumi por hasi e problema pió. Hopi biaha nan ta stroba e siklo di soño, i bo tin ménos soño rekuperador.

Asta si nan yuda bo drumi mes anochi, e soño no ta profundo òf e no ta yuda bo deskansá realmente. Hende por bin kuminsá dependé riba e pildunan aki, i hopi ta desaroyá toleransia pa nan segun tempu pasa, ku ta rekerí mas remedi pa haña mes tantu efekto. E por para bira mas duru awor pa drumi sin e remedi.

## Asina, promé bo guli e pildu ei pa bo problema di drumi, purba e método nan aki:

1. Higiene di drumi.
2. CBT-I Tratamentu di Intervenshon Kòrtiku di Komportashon Kognitivo pa insomnia, ku nos lo bai papia di dje den parti 2 ku ta sigui.

Higiene di drumi ta un kolekshon di hábito ku por yuda bo pega soño mas lihé i drumi mas profundo. Bo por desaroyá esaki riba bo mes. Purba sigui nos shete Hábitonan di Drumidónan Hopi Eksitoso i e lista aki di Hasi i No Hasi. ([7 Habits of Highly Successful Sleepers](#)).

### HASI ESAKI:

- Tene fiho un skema regular di drumi— mes ora di bai drumi, mes ora di lant'ariba, shete dia pa siman.
- Hasi ehersisio por lo ménos 30 minüt pa dia mayoria dia di siman. Pero frena ehersisio pisá mainta òf atardi.
- Haña sufisiente klaridat di lus natural durante dia. Habri kòrtinan mainta i bai pafó den airu fresku.
- Stablesé un rutina regular, relahante segun bo ta prepará pa bai drumi.
- Tuma un baño kayente promé ku subi kama.
- Hasi algun ehersisio leve pa relahá promé ku bai drumi, inkluyendo konsentrá riba bo halamentu di rosea i hasi ehersisio pa relahá bo múskulonan progresivamente.
- Sigurá ku bo medio ambiente pa bai drumi ta agradabel i relahante. E kama mester ta konfortabel, no mester ta ni muchu kayente, ni muchu friu, ni muchu kla. Si ta nesario usa plùg pa sera orea i un máskara pa tapa wowo. Sigurá ku bo kusinchi ta konfortabel.
- Asosíá bo kama ku drumi i sèks so. No traha, ni kome òf wak TV den kamber.
- Bai drumi ora bo tin soño, i lant'ariba si bo ta bòltu i bira.
- Bira kara di bo oloshi pa bo no wak e ora.
- Paga bo telefon pa no tende alerta di tèkstmentu i email ku a dreña.
- Tene un “jurnal di preokupashon” serka einan na man. Si tin algu riba bo mente segun bo ta bai pega soño, skirbi'é riba papel asina bo por revis'é e siguiente dia. Aliviá bo mente!
- Si bo no por pega soño despues di 20 minüt, lant'ariba, hasi algu relahante manera lesa; bolbe bai drumi despues.

### NO HASI ESAKINAN:

- \* No bebe kafeina! Ni kòfi, té, ice tea, bebida di energia i limonada.
- No kome stimulante promé ku bo bai drumi, inkluyendo chukulati i sierto remedinan.
- No kome hopi ni kuminda pisá promé ku e ora di bai drumi.
- No wak TV, usa kòmputer òf pasa largu ratu riba bo aparato promé ku bai drumi.
- E aktividatnan aki ta stimulá e seleber i ta hasi mas duru pa pega soño.

- No usa bo telefon, lèptòp, òf otro mobil device riba kama.
- No keda sedusí pa e gana di drumi durante dia; e por stroba e patronchi normal di drumi/ lanta.

### 3 tep kon rekuperá lihé i efisientemente for di un anochi di no por pega soño <sup>2</sup>

1. **Kambia e forma di pensa tokante soño.** Ta importante pa duna prioridat na soño, espesialmente pasobra haña sufisiente soño ta konektá ku salú di hopi sistema di kurpa— pero no hasi di mas. “Semper mi ta bisa mi pashèntnan pa no troka soño den un amor no rekompensá, ”Dr. Tal ta bisa. “Mas bo yag tras di soño, mas bo ta spant'é i ta kore kuné.” Na lugá di esei hasi e desishon mental aktivo pa ta oké ku un anochi inkieto i di no por pega soño di besenkuando, i mira kada anochi komo un oportunitat positivo pa haña e soño ku bo tin mester. (Atrobe, esaki ta un situashon diferente for di insomnia króniko ([chronic or comorbid insomnia](#)), ku mester keda atendé primordialmente ku yudansa sigur di profeshonalnan médiko.
2. **Tuma un siesta e siguiente atardi.** Si bo sinti hopi soño e dia despues ku bo a trasnochá, (*kua no mester ta e norma*) lo bo ke konsiderá pa tuma un siesta di poder pa yuda ahustá bo kurpa atrobe i restourá bo mente i tene skèrpi.
3. **Bai bèk na e skema kustumbrá di drumi e siguiente anochi.** I no kompensá di mas. Si bo hasi esaki e lo yuda preservá bo ritmo sirkadiano [circadian rhythm](#) (ku ta bo oloshi interno di 24-ora ku ta pone bo haña soño rònt di mésun ora kada anochi i lanta ariba band'i mésun ora kada mainta).

Si bo sinti hopi kansá parti atardi despues di bo trasnochí, bo por bai drumi un poko mas tempran, pero Dr. Tal ta rekomendá pa no reahustá bo ora kustumbrá di bai drumi mas ku un ora.

---

<sup>1</sup> [How to Relieve Insomnia Without Medication: Part 1 | One Medical](#)

<sup>2</sup> [Here's How Long It Takes To Recover From Sleep Deprivation | Well+Good \(wellandgood.com\)](#)

# BÒRCHI DI PROPAGANDA KU TA KANA



Ta inteshon pa bòrchi di propaganda ta simpel, atraktivo i kreativo... Mayoria di hende no ta pensa masha riba nan, pero abo ta un bòrchi di propaganda ku ta kana. Tur kos ku bo hasi i kada pida informashon ku bo saka eifó ta parti di bo marka personal, i ta importante pa tur kos reflehá mésun imágen i vibrashon. No lubidá ku bo tin e poder pa kambia e forma kon hende ta mira bo. Realmente e ta kapasitá bo ora bo realisá ku bo ta kontrolá tur loke bo ta pone eifó, inkluyendo kon hende ta mira bo i ki mensahe bo ta duna. <sup>1</sup>

Pensa riba kuantu biaha nos ta lihé pa huzga hende kasi inmediateamente basá riba nan apariensia. Paña ta un hèrmènt ku por yuda bo tuma kontrol di e forma kon hende ta mira bo i manipulá nan punto di bista. Bo ke mustra ku bo ta un individuo fuerte, ku konosementu, i konfiabel? Bo pañanan por yuda ku esei! Parti di ta un bòrchi di propaganda ku ta kana ta di tin konfiansa den ken abo ta, den kiko bo ta kere, i kiko bo marka ta representá.

### NOS TA BÒRCHI DI PROPAGANDA KRISTIAN

<sup>2</sup> “Paña i adorno no ta djis kosnan eksterno, nan ta mishi ku e ami interior... E tema aki ta hopi sensibel, pasobra e ta atendé ku loke hopi hende ta balorá mas, esta, nan orguyo i banidat. Loke nos ta bisti ta gran parti *ken* nos ta. Nos paña i adorno ta revelá no solamente nos nivel sosial, ekonómiko, i edukashonal, pero tambe nos balornan *moral*. Loke nos tin bisti ta bisa loke nos ke pa mundu kere di nos. Mayoria di hende ke pa mundu admirá nan apariensia eksterior, no pa kritiká esaki.

### Pero e Kristian tin, òf supuestamente mester tin un estilo di bida ku ta representá Kristu i su balornan moral.

<sup>3</sup> “*Lo mi regosihá grandemente den Señor, mi alma lo ta gososo den mi Dios; pasobra el a bisti mi ku e pañanan di salbashon, el a kubri mi ku e mantel di hustisia, manera un brùidegòm ta dòrna su mes ku adorno, i manera un brùit ta dòrna su mes ku su hoyanan*” (Isaías 61:10).

Papiando di hende hòmber i hende muhé den Skritura... Nos por mira kaminda profetanan a bisti paña gròf; yunan di e reinan a bisti pañanan karu; prostitutanen a bisti pañanan engañoso i esnan ku ta pover tabata kontentu di tin algu pa tapa nan kurpa kuné.

<sup>4</sup> “Ki ora ku bo desishonnan ta guiá dor di egoismo na lugá di amor pa Kristu, ta komo si fuera bo ta kana rònt ku paña mahos sin realisá mes kon desagradabel bo ta parse na otro hende. Pero ora pone orguyo un banda i bo bisti e birtutnan Kristian, otro nan por mira beyesa inkreibel ora nan topa bo.



Ata aki e forma kon abo i ami por bisti pañanan SPIRITUAL ku ta reflehá Kristu Su karakter:

**Rekonosé ku Dios a skohe bo pa bisti e pañanan aki.** Dios a skohe bo sigur pa kuminsá kana riba e kaminda spiritual aki di desaroyá Kristu Su karakter. Bo no mester spanta i bira tristu mirando kon hopi bo tin ku krese komo hende pa desaroyá birtutnan santu pa bisti, pasobra Dios sabi eksaktamente ki sorto di yudansa bo tin mester, i E mes lo kapasitá bo i yuda bo kada stap di e kaminda.

**Invitá Dios pa fet bo den e pañanan aki.** Fet den paña spiritual no ta sosodé djis dor di purba manehá bo komportashon; e ta bira posibel ora abo invitá Dios transformá bo for di paden bin pafó, pa hasi bo santu. Ora ku bo koperá ku Dios Su trabou den bo bida pa kambia bo alma i hasié mas mihó, di forma natural lo bo fet den e pañanan spiritual ku E ke pa bo bisti.

**Deskubrí kua ta e sekreto pa bisti e pañanan aki.** Yena bo mente ku e realidat aki di Dios Su profundo amor inkondishonal pa bo. Konosé e amor di Dios ta e sekreto berdadero pa bisti pañanan spiritual bon, pasobra esaki ta duna bo e konfiansa i libertat ku bo tin mester pa desaroyá birtutnan Kristian. Na lugá di tin miedu di kai den bo mes esfuersonan di modifiká bo komportashon, bo ta liber pa disfrutá di e proseso di Dios trahando den bo bida, konfiando ku Su trabou lo no faya.

### SUGERENSIA KIKO BISTI



**Bisti pordon.** Aseptá e pordon ku Dios ta ofresé bo ora bo arepentí, i laga bo gratitut pa Su pordon motivá bo pa obedesé Su mandato pa pordoná otro hende ku a heridá bo. Tene na kuenta ku, asta ora bo no ta sinti pa pordoná un hende, semper bo por skohe pa kuminsá ku e proseso di pordon a pesar di bo sintimentunan, i despues dependé riba Dios Su ayudo pa pordoná kada stap di e kaminda. Aseptá Dios Su pordon pa bo mes pikánan ku bo a arepentí di dje lo libra bo mes di kulpa i bèrguensa i pordonando otronan ku a peka kontra bo lo saka e veneno di amargura for di bo alma— i nan tur ta hasi posibel pa bo por krese i hala mas serka di Dios.

**Bisti pas.** Kuminsá dor di sigurá ku bo a kuminsá seriamente ku un relashon ku Kristu komo bo Señor i Salvador, i pone tur bo konfiansa den djE. Bo por eksperensia pas solamente ora ku bo ta den e relashon korekto ku Dios dor di Kristu – un relashon ku piká no por kibra, pasobra Kristu a paga e preis di piká pa bo. Ki ora ku tenshon di bida den e mundu kaí aki kita bo sentido di pas, resa pa pas, i Kristu fielmente lo duna bo un dós fresku di pas ku ta E so por duna. Ya ku Dios Mes ta bo pas, pidi **Spiritu Santu** hasi bo konsiente di Su presensia konstantemente huntu ku bo, i laga e konsientisashon ei duna bo pas suficiente fuerte pa vense kualke sintimentu di tenshon ku bo por ta pasando dor di dje. Hasi bo mihó pa biba den e forma ku Dios ta pidi bo biba den kada parti di bo bida, ya ku eskohonan fiel di forma natural ta hiba na bida ku ta liber di tenshon innesesario.

**Bisti bondat.** Na lugá di atendé bo mes asuntunan so, buska e bon di otro hende tambe. Pidi Dios yuda bo ripará ora hende mester di enkurashamentu, konsuelo, i yudansa, i probechá asina kada oportunitat ku Dios trese den bo kaminda pa respondé na nan nesidatnan ku palabranan i akshonnan di bondat. Kòrda ku Dios a mustra bondat na abo dor di tene miserikòrdia ku bo i a manda Kristu pa muri pa bo pikánan asina bo por ta salvá. Hasié pa otronan tambe.

**Bisti humildat.** Meskos ku Kristu a humiyá Su mes pa bandoná shelu i bin na e Tera aki pa sirbi hende, bo mester sigui Su ehèmpel i sirbi otronan. Pidi Dios revelá na bo orguyo ku ta stroba bo di desaroyá humildat; despues konfesá i arepentí di e orguyo ei. Bandoná bo ambishonnan egoista asina bo por uni ku Dios den e trabou poderoso di yuda otronan.


**Bisti kompashon.** Pidi Dios yuda bo ripará nesesidat di e hendenan. E ke pa bo yuda, i E ke duna bo e deseo pa yuda nan asina ku abo tambe lo rèk man den amor na lugá di djis sinti ku ta un deber kristian. Reflekshoná riba tur e forman ku bo a sufri personalmente den pasado, i pidi Dios mustra bo kon bo por yuda otro hende ku aktualmente ta sufri den mésun forma. Siña di nesesidat di e hendenan rònt di bo; skucha na nan historia. No titubiá pa tuma akshon ki ora ku bo sinti ku Dios ta guia bo pa yuda hende ku ta den nesesidat.

**Bisti pasenshi.** Reflekshoná riba bo mes bida pa konsiderá e hopi forman den kua Dios tabatin pasenshi ku bo, i laga gratitut pa Su pasenshi motivá bo pa kontestá Su yamada pa tin pasenshi ku otro hende. Resa pa yudansa di Spiritu Santu pa investí den bida di hendenan rònt di bo i desaroyá pasenshi segun ku bo ta hasi sakrifisio pa konstruí relashonnan mas fuerte.

**Bisti goso.** Okupashonnan mundano por trese pa bo pañanan di felisidat ku bo por bisti temporalmente, pero ku tempu nan ta bin gasta, i ta laga bo sunú, buskando desesperadamente pa e siguiente kos nobo ku por tapa bo ku un sentido di felisidat pa un otro tempu kòrtiku. Pero e goso ku Dios lo bisti bo kuné tin e poder di dura, no importá kon bo sirkunstansianan kambia. Bo por bisti goso ora bo respondé na Dios Su amor dor di bisti e otro birtutnan. Únabes bo eksperensia e hopi forman kon kada un di e birtutnan ei por hasi bo bida bunita, lo bo disfrutá di bo bida.







“Dios Su kreashon original di sernan humano i selestial tabata perfekto den funshon, diseño, i beyesa. No tabatin mester di “makeup” kosmético òf di adorno pa tapa òf mehorá e apariensia di Su kriaturanan (p. 43)

<sup>5</sup> “Puiru i fèrf no ta tapa e korupshon interior di e kurason, ni seda i satin no por skonde e manchanan mahos di e alma. Jezebèl tabata korupto paden apesar di tur su esfuerso pa hasi e parti pafó bunita. Dios ta wak na e kurason i E ta pidi adorno interior na lugá di esun eksterior (1 Pedro 3:3).

**“Un muhé su bistí ta un spil di su mente.”**

Ellen White a skirbi, Un persona su karakter ta keda husgá dor di su estilo di paña. Un smak refiná, un mente kultivá, lo keda revelá den e eskoho di paña simpel i apropiá.” (Ed 248)

“Un hende muhé Kristian mester kòrda ku su enkanto no ta sinta solamente den loke e ta revelá, pero tambe den loke e ta tapa. Un hende muhé ku ta biti pa mostra su apelashon físiko i seksual ta enkurashá hende hòmbler pa trat’é komo opheto seksual... ‘Obediensia na moda... ta hasiendo mas ku kualke otro poder pa separá nos pueblo for di Dios.” (4T 647)

“Paña no ta hasi hende Kristian, pero Kristiannan ta revelá nan identidat dor di loke nan ta bistí i nan apariensia.” (4T 169)

**“Hende ta aktua manera nan ta bistí”**

“Bisti pa Dios Su gloria no ta algu horibelmente difísil. Pero ta tuma boluntad di nos parti pa lag’É kambia nos aktitut.” (4T 194)

“Komo Kristian nos ta revelá e beyesa di Kristu Su karakter dor di bistí den forma modesto, desente, i ku ta pas, evitando adorno lombrante. Nos apariensia eksterior ta un testigu konstante di nos identidat Kristian. E ta bisa mundu ku nos ta biba pa gloria di Dios i no pa gloria nos mes.” (Samuelle Bacchiocchi, *Dress & Ornaments*, p. 20)

## MEDITÁ RIBA ESAKI:

- Loke nos bistí paden i pafó di kas ta kontá su mes historia. Ora nos bai nos skol, nos trabou, ora nos bai supermarket, mall, klas di muzik, kampamentu, na programanan pa mucha i pa hóben, ora nos bai keiru, ki mensahe nos ta duna? Tin un diferensia entre nos i esnan mundano? Sea bo ta un mucha muhé òf un yu di pastor adulto, sea hòmbler òf muhé, puntra bo mes: Mi ta bistí den forma desente?
- Esnan muhé, boso paña ta transparente pa “show” loke boso tin bistí bou di boso paña òf boso ta bon tapá?
- Ora bo bùk piki algu abou na suela, bo ta hasi esei den forma desente?
- Ora bo kai sinta, bo ta hasi esei ku bo pianan huntu i ku bo paña bou di bo rudia? Especialmente si bo ta sintá riba plataforma?
- Bo ta bistí pero tòg “sunú” pa motibu di e tela di paña ku ta aksentuá tur kos?
- Muchanan hòmbler, e ta hasi algun diferensia unda bo ta kana, para, sinta? E ta hasi kualke diferensia kiko bo tin bistí?
- Bo pañanan ta indiká ku bo ta konsiderá bo mes un hoben di balor?
- Nan ta yuda oumentá bo rèspèt-propio? Bo konfiansa-propio? Imágen propio?
- Nan ta komuniká un mensahe berdadero na otronan, òf nan ta reflehá un imágen falsu di pobresa i “humildat artifishal”?
- Nan lo afektá bo testifikashon pa Kristu? <sup>6</sup>

“Nos palabranan, nos akshonnan, nos komportashon, nos pañanan, tur kos mester **prediká**. No ta solamente ku nos palabranan nos mester papia ku e hendenan, pero tur kos ku tin aber ku nos mester ta un sermon na nan, pa impreshon korekto keda riba nan, i ku nan por bai ku e bèrdad papiá na nan kasnan. Asina nos FE lo keda den mihó lus dilanti e komunidad.” <sup>7</sup>

<sup>1</sup> [Lessons learned from a Walking Billboard - Search \(bing.com\)](#)

<sup>2</sup> *Christian Dress & Adornment* by Samuele Bacchiocchi, p. 11

<sup>3</sup> [BIBLE WARDROBES AND THE CHRISTIAN WOMAN'S SPIRITUAL CLOTHING – Lesson 13 – THE CHRISTIAN WOMAN'S SPIRITUAL WARDROBE – Part 2 | MULIEBRAL VIEWPOINT \(helpmeettohim.org\)](#)

<sup>4</sup> [Put on Spiritual Clothes \(crosswalk.com\)](#)

<sup>5</sup> *Christian Dress & Adornment* by Samuele Bacchiocchi

<sup>6</sup> *Man in demand*, p. 27, 54

<sup>7</sup> Ellen G. White, *Testimonies*, vol. 2, p. 610-613, 618

# MUCHA PREDIKADÓ



KOMO MUCHA, UN DI BO SOÑONAN TABATA PA BIRA UN MENSAHERO PA KRISTU? Asina hopi biaha nos ta maraviá, kiko mi tin ku hasi? Kon pa prediká e evangelio di Kristu i trese mión di hende na e tou manera e disipelnan a hasi.

Nos ta kuminsá skirbi loke ta rekerí pa bira un predikadó. Un, mi mester por papia bon den públiko. Dos, mi mester partisipá den programa di Sabatskol pa siña kon papia dilanti un kongregashon. Despues di hopi fayó, sodamentu, nerviosismo, bo por frustra i kuminsá maraviá si bo lo logra bira un mucha predikadó òf un predikadó.

Trese esnan pèrdí den e reino di Dios? E soño mayoria di biaha ta keda na wèrki. Desapuntá, sin speransa ku bo no tin e don pa bira un predikadó/ orador. Bo ta mira otronan ta bira mihó ku bo. Mucha predikadó, orador elokuyente, ta habri nan boka prediká i ta trese esnan pèrdí na Kristu, bèrdat?

No ta bèrdat, bo sa! E importansia no ta den e título di bira un mucha predikadó, i mi ta akinan pa elevá bo mente. Loke ta importante no ta kon bon bo por papia dilanti di un grupo. Bo sa, importante ta e bida ku bo ta biba “pafó” di e predikashon. No ta nos tur tin mésun talento, i no ta nos tur ta ekipá pa prediká. E artíkulo ta akinan pa bisa un hende, ku ta oké. Ta oké ku bo no ta un predikadó. Si Dios tabata ke solamente predikadónan riba e mundu aki, nos mundu lo tabata desbalansá.

## E Disipelnan

Tin biaha kosnan ta pasa den iglesia, ku pastor-  
nan òf predikadónan no por yuda kuné, manera  
den Echonnan 11:29. Un di e profetanan a haña un  
vishon ku lo tin hamber den e tera. Asina Beibel ta  
bisa: “E disipelnan a disidí di manda yudansa pa e  
rumannan ku tabata biba na Hudea; kada un a  
duna segun su forsa.” Manera e teksto aki ta mus-  
tra, tin biaha predikashn no ta e úniko talento/ don  
ku por yuda otronan buska Kristu. Den e tempu di  
hamber, e disipelnan por a bai i prediká, pero no  
ta esaki e hendenan tabatin mester. Nan tur tabata  
bon predikadó, pero na e okashon aki no tabatin  
mester di esei. Nan talentonan/ donnan insignifi-  
kante, aparentemente, a yuda aliviá esnan ku  
tabata sufri di nesesidatnan urgente. Bo talento òf  
don por parse sin balor, pero Señor por us’é. Asi-  
na, no desanimá, nos Dios tin un propósito pa ka-  
da un di nos riba e tera aki. Si te ainda bo no ta  
konvensí, laga nos sigui.

## Trabou di Dios Su Man

Efesionan 2:10 ta bisa: “Pasobra nos ta e obra  
di Su man, kreá den Kristu Hesus pa bon obranan,  
kualnan Dios a prepará di antemano, pa nos kana  
den nan.” (BS) Mi ta gusta kon e tradukshon The  
Message ta pone e teksto aki, e ta bisa for di 7-10:

“Awor Dios tin nos kaminda E kier nos, ku tur e  
tempu den e mundu aki i esun siguiente pa yobe  
grasia i bondat riba nos den Kristu Hesus. Salba ta  
kompletamente Su idea, i henter su trabou. Tur  
loke nos ta hasi ta di konfié sufisiente pa lag’É  
hasié. Ta Dios Su regalú for di komienso te final!  
Nos no ta hunga e ròl prinsipal. Si tabata asina,  
kisas nos lo a kana rònt ta broma ku ta nos a hasi  
tur kos! Nò, nos no a traha ni ta salba nos mes.  
Dios a traha i ta salba. El a krea nos kada un dor  
di Kristu Hesus pa uni kuné den e trabou ku E ta  
hasi, e bon trabou ku El a prepará pa nos hasi, i ta  
mihó nos hasi nan.”

Asina, manera e teksto ta bisa, bo’n tin pakiko  
preokupá tokante bo talentonan, òf ki don bo tin,  
pa trese hende na Kristu, pasobra Kristu Hesus tin  
tur kos bou di kontrol. Ya E sabi kaba kiko E tin  
mester for di kada un di nos. E donnan ku El a du-  
na nos ta spesial den nan mes forma. Tur loke bo  
mester hasi ta di konfia den djE.

## E Santuario

Éksodo 35:10 ta bisa: “I laga tur hòMBER eks-  
perto entre boso bin i traha tur loke Señor a or-  
dená.” (BS). E santuario tabata un parti importante  
di Dios Su plan pa Israel den tempu di Moises. El  
a pidi Moises buska e hendenan di fishi ku por tra-  
ha Su santuario, E no a pidi pa esnan ku por a

papia bon, El a pidi pa esnan ku por a traha loke  
ta mas mihó pa su “Iglesia” pa asina E por biba  
einan. Manera bo por mira, Dios semper sa kiko  
E ke for di kada un di nos. Tur loke nos mester  
hasi ta di konfia den djE, I lag’É biba den nos  
kurason, nos kas, i nos mente

Komo mucha abo tambe por hasi un impakto i  
no mester ta predikamentu. E mucha muhé kriá  
di Naaman su señora a hasi un impakto riba  
otronan, I despues riba e nashonnan, ku djis un  
par di bon atributo.



## E Kriá Chikí

Den 2 Reinan 5 nos aat mira e historia di e  
mucha katibu ku tabata kuida pa kasá di Naa-  
man. E no tabatin e poder di papia. Kisas ni e  
abilidad di bisa loke e ta pensa tin biaha. E tabata  
un katibu den un pais straño, e tabata un mucha  
i un hende muhé, i e tabata un prisionero di gue-  
ra. (Shipp, 2020) Ta tres atributo ku ta hasié e  
persona ménos importante den kas di Naaman.  
Manera ta bisa den Bonner, 1994; Hendel, 2008  
“E anonimidad di e kria i e esposa ta revelá kon  
tabata mira identidat di hende muhé den e kultu-  
ra Hebreo. E identidat di figura maskulino den e  
narashon bíbliko ta konsistente ku patriarkia bí-  
bliko. Hende hòMBER tabatin promé bos miéntras  
ku hende muhé tabata sekundario. E anonimidad  
di hende muhé ta pas ku e uso di arketiponan  
den narashon” (Shipp, 2020). Esaki ta djis pa  
mustra, kon den Tèstament Bieu, kon tiki chèns  
hende muhé tin pa papia den Beibel. Asina por  
mira ki kurashi e kria chikí aki tabatin pa papia i  
bisa ku e konosé un hende, ku por kura su shon.

Promé ku tur kos, pakiko? E tabata un katiibu, si e shon muri, e por keda liber, òf haña un shon mas mihó, E kriá chikí tabatin dos karakterístika ku a pone Dios us'é, pa Su gloria. Un tabata *kurashi*. Ta tuma kurashi pa bisa algu asta na kasá di su shon. E di dos ta su *naturalesa kariñoso*; e tabata ke bon pa e señora, te na punto ku e ke mira e famia ei felis. Esaki tabata asina maravioso, nos tin ku kòrda, un, e ta katibu den un tera strañu (Siria) leu for di Israel. Siria i su pais natal ta enemigu di otro, e ta kriá di un di e generalnan di Siria ku a destruí i mata sòldatnan Israeli. E por a bira manera un di e pelíkulanan, un 'heroe pa Israel' i venená Naaman.

Dos, e ta un Huidiu, ku lo no por praktiká su fe manera e ke. Awor e ta un sirbidó, ku ta leu for di su famia, i tera, nunca lo e mira nan atrobe. E ta spantá i so. Tabatin asina hopi senario kontra dje, pero tòg, su naturalesa bondadoso ta prevalesé. Te na punto ku e ta bisa Naaman, ku e konosé un profeta ku por kur'é di su lepra. "*Ken bo ta no ta importante, pero ken bo ta sirbi sí ta*" (Shipp, 2020). Smith, 1994; von Rad, 1977 ta bisa ku ta menshoná e kriá chikí solamente un biaha den henter e historia di Naaman, pero tòg, su influensia i su karakter, a kambia henter e narrativa di e historia di Naaman i su famia (Shipp, 2020).

### **E kria chikí ta mustra atributonan di disipel**

Komo un mucha katibu e tabata desampará, meskos ku Israel tabata pa Siria (Menn, 2008). E ta un ehèmpel ku hopi hóben ta enfrentá desafionan mas ayá di nan kontrol. P'esei, instrukshon Kristian mester kuminsá na kas. Por haña e nesesidat pa mayornan su disipulado den skrituranan manera Deut. 6:6-9, Prov. 22:6, i 2 Tim. 3:14-15. Clarke (1837) ta deklará, "I mira e benefisionan di edukashon religioso! Si e mucha aki no a lanta ku konosementu di e Dios berdadero, e lo no tabata instrumènt di un salbashon asina grandi" (p. 500).

### **Mayornan no sa kon Dios lo bai usa nan yunan pa Su gloria**

Loke e mucha chikí kriá a tende a laga un impreshon asina grandi riba dje ku e tabata por a kompartí esaki ku otronan tambe. Brueggemann (2007) ta sugerí ku e kria chikí ta un evangelista ku a yuda krea un storia di speransa ku tin su rais den e úniko Dios berdadero den e komunidad di Siria. Por mira mésun spiritu balente den e bida di Daniel i e tres mucha hòmbenan Hebreo. (Daniel 1).

**Muchanan ta skucha.** Mester kompartí Dios Su bondat kontinuamente ku nan. Konsekuentemente, Dios stratégikamente ta manda esnan ku ta dispuesto pa hasi esei, den kulturanan kaminda tin hopi oportunidat pa ta un disipel i pa evangelisá otronan (Brueggemann, 2004) (Shipp, 2020).



**Dios tin un propósito pa kada un di nos den nos bida.** Tin biaha e por parse modesto, sin importancia, manera e naturalesa kariñoso i bondadoso di e kria chikí, pero e por kambia un nashon.

**KONKLUSHON:** Nos tur tin talento, donnan ku kisas tin nada di hasi ku predikashon komo mucha. Sin embargo, Dios por usa nos pa Su gloria, pa kambia un nashon manera e kria chikí a hasi na Siria. Pa yuda hamber den un pais leu manera e disipelnan a hasi. Pa tuma parti den konstrukshon di e santuario. Predikashon di e evangelio ta importante, pero no laga nos lubidá e donnan "chikitu" ku nos tin. Esnan ku niun hende lo mira òf tende, e donnan ku abo ta kere lo no kambia ningun hende su bida. Kuminsá na skol, na trabou, na misa, nos donnan ta hasi un diferensia, p'esei ban kere, ku Dios ta prepará e kaminda pa bo, pa ta e kambio.

---

**Skirbí dor di: Claudienne Presentacion-Gudge**

Bibliografia:

Shipp, J. E. (2020). Guia for di e márgennan: E kria chikí na Siria. *Journal of Perspectives in Leadership* 10, 66-80.

# SI TIN BOLUNTAT, TIN UN KAMINDA!

## SEA E SERMON



## **Miles di Atventistanan di Shete Dia a impaktá nan komunitat den mas ku 100 pais riba djasabra, mart 18 durante e evento anual di Global Youth Day (Dia Global pa Hóbennan).<sup>1</sup>**

E esfuerso, organisá dor di e Departamentu di Ministerio Hubenil di Iglesia Atventista, a yuda ranka sali ku e Siman di Orashon Hubenil titulá “Revolushon— E Reforma ku ta Kambia Mundu.”

Hóbennan Atventista a bai un di dos mia den hasi trabou di servisio na komunitat dor di e luna di mart, terminando sabat, mart 18, ku e Dia Hubenil Global.

Segun potrèt i videonan tabata keda kompartí riba media sosial ku e *hashtag* #GYD17, e kampaña a generá un impakto di mas ku 137 mion impreshon na Facebook, Twitter i Instagram. E strategia di media sosial, implementá dor di e departamentu di komunikashon i Iglesia Atventista di Shete Dia, a kibra un rèkòrt pa iglesia Atventista den media sosial.

Sam Neves, direktor asosiá di komunikashon pa Iglesia Atventista di Shete Dia a bisa, “Nos ta un iglesia global: ku 20 mion miembro, ku 924 idioma, ku 150,000 kongregashon lokal den total 208 pais i teritorio. Dia Hubenil Global ta e oportunidat mas grandi ku nos tin pa eksperensia unidat segun nos ta bini huntu bou di e mishon singular di ta e mannan i pianan di Hesus pa nos komunitatnan.”

Sam Gungaloo, un pastor na parti sùit di Inglatera i Kehrys Sterling di Vancouver Canada, a transmití e transmishon di 24 ora for di e sèt di Dia Hubenil Global— un avion ku korektamente tabata yama “AirGYD”. Kuminsando na Stimme der Hoffnung, ku ta dirigí e Hope Channel na Alemania, AirGYD virtualmente a “bula” rònt mundu raportando di aktividatnan #GYD17 durante e programa live, online, filmando tur kos. Nan a transmití e show di 24 ora dor di Hope Channel i YouTube Live.

AirGYD su kapitan i direktor hubenil asosiá pa Iglesia Atventista di Shete Dia, Pako Mokgwane, a keda presentá durante henter dia den notisianan i akontesimentunan inspirador i entretení for di e kòkpet i kabina di AirGYD.

E tema di servisio pa e aña aki tabata pa duna sanger. A kòrda e hendenan ku kada penchi di sanger por yuda salba 3-bida. Hóbennan Atventista a respondé masha generosamente na e “global blood drive.” Hóbennan Atventista di Shete Dia rònt mundu a haña tambe algun otro forma pa nan “Ta e Sermon” den nan komunitatnan.

Hóbennan na Oustralia a kòrta yerba pa nan bisiñanan. Hóbennan Taiwanés a alegrá kurason di amigunan nobo den kasnan di kuido. Na Spaña, hóbennan ku base na Madrid tabatin un “Ekspo di Amor” kaminda esnan ku pasa eibanda por a siña mas kon ekspresá amor na otronan dor di nan mes “lenguahe di amor.”

Presentadónan na Peru a enfatisá esfuersonan pa duna alivio ora tin inundashon i un orashon spesial dor di tripulante di kabina di AirGYD a keda ofresé pa sostené esnan ku a pèrdè asina hopi den e desaster natural.

Un transmishon for di paden di un prison na Kenia pa #GYD17 a generá hopi diskushon riba kon yuda prisioneronan. Un panel di hóbennan ku base na Silver Spring, Maryland a reflekshoná riba kuantu heroenan Bíbliko a keda enkarselá pa nan fe.

Sofanan di Sabat tambe tabata un hit global di #GYD17. Na varios lugá rònt Gran Britania, hóbennan Atventista a pone sofanan den lugánan hopi transitá pa hende na pia. E timnan di Sofa di Sabat ta promové deskanso di Sabat dor di invitá hende ku ta pasa band’i nan pa kai sinta, deskansá i kòmbersá un ratu ku nan.

Segun e maratòn di 24 –ora tabata yegando na su fin, ko-piloto di AirGYD i vise presidente general di Iglesia Atventista Mundial, Abner De Los Santos, a rekordá esnan ku tabata sigui nan global via transmishon live ku #GYD17 tabata muchu mas ku djis un dia. El a enkurashá hóbennan Atventista pa hasi e tipo di servisio aki un estilo di bida.

Un tim motivá guiá dor di Departamentu di Ministerio Hubenil di Iglesia Atventista di Shete Dia a yuda sigurá ku #GYD17 tabata un eksito. E tim hopi grandi tabata inkluí tambe e seleber prinsipal tras di e strategia di transmishon i ingenieria, Daryl Gungadoo, mèneder di distribushon global pa Adventist World Radio.

Reflekshonando riba e dia, Mokgwane a bisa, “Por konfia e hóbennan. Tur loke nan tin mester ta un chèns. GYD ta ofresé nan un plataforma pa nan ekspresá nan talento. E aña aki, nan a tuma kreatividat na un otro nivel. GYD no mester ta un evento. E mester ta un estilo di bida. E ta pone mas hende puntra, ‘Ta ken boso ta?’ E pregunta aki ta habri chèns pa un bon kombersashon tokante e amor di Hesus.”

Ted N.C. Wilson, presidente di Iglesia Mundial Atventista a partisipá tambe den Global Youth Day na Merka. “E ta algu hopi poderoso na fin di tempu akinan promé ku Hesus bini, pa por kompartí mensahe di e tres angelnan den forman praktikò i tambe den predikashon.”



**<sup>2</sup> “Hende lo respetá bo hopi si nan mira ku loke bo ta bisando ta loke bo ta hasiendo. Pastor Wilson a yama e plan mishonero aki Envolvimentu Total di Hóbennan, tur hende hasiendo algu pa Hesus.”**

### **HOYANAN FOR DI SPIRITU DI PROFESIA**

“Señor ta sankshoná esfuerso di e obrero konsagrá, e wardadó berdadero. E por tin tiki tempu pa prediká diskursonan, pero e por ak-tua sermonnan ku lo ta muchu mas poderoso. E bèrdat ekspresá den aktonan bibu, sin niun egoismo, ta e argumentu mas fuerte na fabor di Kristianismo” (*Counsels on Health*, p. 537).

“Nos palabranan i akshonnan ta komponé e fruta ku nos ta karga. *Un bida konsagrá ta un sermon diario i bibu*” (4T 609). Énfasis suplí.

“E sermon mas efektivo ku bo a prediká tabata ora bo a biba e prinsipionan di bèrdat den bo mes famia i a revelá bo dedikashon sinsero na e trabou” (2SM 201).

### **E DEPENDENSIA HUMILDE DI TIMOTEO <sup>3</sup>**

“Den e storia di Timoteo nos por haña presioso lèsnan. E tabata djis un mucha ora Dios a skohé komo maestro; pero su prinsipionan tabata asina fiho dor di un edukashon korekto ku e tabata pas pa e puesto importante aki.

E tabata kumpli ku su responsabilidatnan ku un mansidumbre manera Kristu. E tabata fiel, firme, i leal, i Pablo a skohé pa ta su kompañero den labor i biahe.

A ménos ku Timoteo hañ’é ku despresio, pasobra e ta yòn, Pablo a skirbi’é, “No laga niun hende menospresia bo hubentut.” E por a hasi esaki tranquil, pasobra Timoteo no tabata independiente, pero kontinuamente e tabata buska konseho.

Tin hopi hóben ku ta move for di impulso na lugá di huisio. Pero Timoteo tabata puntra na kada stap ku e dal, “Esaki ta e kaminda di Señor?”

**E no tabatin niun talento briante speshal, pero el a konsagrá tur su abilidadnan na e servisio di Dios, i esaki a hasi su trabou hopi balioso.**

Señor a haña den dje un mente ku e por a moldia i forma pa Spiritu Santu biba den dje.

## Dios lo usa e hóbennan awe manera El a usa Timoteo, basta nan someté na Su guia.

E ta bo privilegio pa ta mishonero di Dios. E ta yama riba bo pa traha na fabor di bo kompañeronan. Buska esnan ku bo sa ta den peliger, i den e amor di Kristu purba yuda nan.

Kon nan por konosé e Salvador, a ménos nan mira Su birtutnan den Su siguidónan (Yl Feb. 13, 1902)?

## EHÈMPEL

Albert Schweitzer a bisa: “Ehèmpel no ta e kos prinsipal den influensia otronan. E ta e úniko kos.”

Ki kualidat abo mester tin pa ta un bon ehèmpel pa otronan?

Un sita ta bisa: “Si bo ke pa esnan ku bo ta guia wak na bo komo un bon ehèmpel, anto wak pa bo tin un kurason di sirbidó, tuma responsabilidad pa bo akshonnan, papia ora algu ta robes, i no buska gloria pa bo mes. Mundu hopi biaha ta siña lidernan pa mustra i aktua tòf, pa usa lenguahe gròf òf papia palabra malu, pa falta rèspèt pa outoridat òf abusá di esun di nan mes, i pa dobla e reglanan pa nan mes benefisio. Pero na final, ta nèt e hendenan ku kontinuamente ta kariñoso, íntegro, ku amor profundo pa Dios ta esnan ku ta mas respetá i honrá.” (*Divine Moments for Leaders*, p. 132).





**“Sea e Sermon”**. E ta un frase tremendo. Saka e tempu ei pa hasi aktonan di bondat na otronan.

Den wikènt di e evento aki, a mira kla ku no tabata sufisiente pa djis prediká e sermon, pero mas importante ta pa SER e sermon; ser un testimonio bibu kanando i laga otro sa di e gracia di Kristu, pa mundu por mira. Tabata e outor Edgar A. Guest ku a skirbi e siguiente palabranan.

*Edgar Albert Guest* tabata un eskritor Merikano, nasé na Inglatera, i su poesianan tabata hopi lesá i gustá durante e promé mitar di siglo 20. El a skirbi esun aki tambe ku ta sigui:

#### SERMONNAN KU NOS TA MIRA <sup>4</sup>

Mi ta preferá mira un sermon ku tende un un dia:  
Mi ta preferá un hende kana ku mi ku djis bisa e kaminda.  
Wowo ta un mihó alumno i mas dispuesto ku e orea,  
Bon konseho por konfundí, pero ehèmpel semper ta kla;  
I mihó ku tur e predikadónan ta e hendenan ku ta biba loke nan ta bisa,  
Pasobra pa mira bon den akshon ta loke tur hende mester.  
Ami pronto por siña hasi'è si laga mi wak kon bo ta hasiè;  
Mi por wak bo mannan den akshon, pero bo lenga por kore mucho lihé.  
I e lektura ku bo ta duna por ta hopi sabí i bèrdat,  
Ma mi ta preferá haña mi lèsnan dor di wak loke bo ta hasi;  
Pasobra mi por komprondé bo robes, i tambe e konseho grandí ku bo ta duna,  
Pero no por komprondé robes e forma ku bo ta aktua i kon bo ta biba.



Esaki ta un bunita potrèt di entrega di nos muchanan na Dios ora nan ta yòn, pa risibí Su Spiritu i dediká henter un bida na Su servisio di amor na otronan.

Ora mi wak un akto di bondat, mi mes ke ta bondadoso.  
Ora un ruman mas swak trompeká i un fuerte keda patras,  
Djis pa mira si e por yud'è, e ora ei e deseo ta krese den mi.  
Pa ta mes konsiderá manera mi sa ku e amigu ei ta.  
I tur biahero por mira ku e mihó guianan di awe  
No ta esun ku ta bisa nan pero esun ku ta mustra e kaminda.  
Un bon hende ta siña hopi, hende ta kere loke nan ta mira;  
Un akto di bondat mirá ta bal kuarenta bisá.  
Esun ku para ku hende di honor ta siña apresí su honor,  
Pasobra biba korekto ta papia un lenguahe ku ta kla pa tur.  
Maske un orador talentoso enkantá mi ku su elokuensia, mi ta bisa, mi ta preferá *mira* un sermon ku tende un, kualke dia

#### EFESIONAN <sup>5</sup>

Loke nos sa di Dios i loke nos ta hasi pa Dios tin un forma di plama for di otro den nos bida. E momentu ku e unidat orgániko di kreensia i komportashon dañá den kualke forma, nos ta inkapas di biba e humanidat kompletu pa kua a krea nos. Pablo su karta na e Efesionan ta pega huntu loke a sker for di otro den nos mundu wèrkiá dor di piká... Únabes yama nos atenshon na dje, nos ta mira pida pidanan tur kaminda. Kasi no tin ningun wesu den nos kurpa ku a skapa herida, kasi un relashon den stat òf trabou, skol òf misa, famia òf pais, ku no a sali for di lugá òf ta kokochá ku doló. Tin hopi trabou pa hasi.

I asina Pablo ta kuminsá traha. E ta kubri tur kos, for di shelu te tera i bèk atrobe, mustrandu kon Hesus, e Mesias, ta eternamente i inkansabelmente tresiendo tur kos i tur hende huntu. E ta mustra tambe ku apart di laga hasi e trabou aki den nos i pa nos, nos tur ta partisipante den e trabou hopi urgente aki.

*Yu di pastor, abo ta un bon sermon?* Bo forma di biba, di papia, di bisti, di studia, di traha, di adorá i di trata tur otronan ta un bon ehèmpel? Kiko hende ta mira den bo ora ku nan topa bo òf tende bo? Nan ta kapta ku abo ta un yu di Dios, òf bo ta un mundano? Mara esaki por ta bo lema: “Mi por enfrentá tur kos pa medio di Esun ku ta duna mi forsa.”

<sup>1</sup> [Global Youth Day - Adventist Youth Ministries](http://GlobalYouthDay-AdventistYouthMinistries.org)  
([gcyouthministries.org](http://gcyouthministries.org))

<sup>2</sup> [News | Adventist News Network](http://News-AdventistNewsNetwork.org)

<sup>3</sup> 7 BC 915



WLO  
MI  
MURI  
PA  
BOY

### Lès no. 3: Dios no ta hunga favoretismo

Nos ta mira akinan den (Mateo 4:18) ku Hesus tabata kana banda di e Laman di Galilea pa buska Su disipelnan. *Hesus no tabata buska entre sumo-saserdotenan, ansianonan, lidernan, reinan, i otro hende prominente*. E no tabata buskando nan den e korte di Herodes, den palasionan, i kastelnan kaminda por a haña esnan poderoso i di noblesa. Hesus a yama piskadónan pa forma parti di Su sírkulo interior. Den e normanan di hende, Pedro i e otronan ta nada. Pero pa Kristu, *nan tabata hende di balor*. Na e momentu ei, Pedro no tabatin idea mes kon e i su kompañeronan lo bai kambia mundu kompletamente! (1 Korintionan 1:26-28).

### Lès no. 4: Nos mester ta diligente den nos trabou

### Lès no. 5: Hesuskristu ta Yu di e Dios Bibu

### Lès no. 6: E fundeshi di iglesia ta Kristu Hesus

Nos tin ku realisá ku Kabes di iglesia ta Kristu Hesus i no un lider humano. Tin biaha nos ta djis pèrdè bista for di riba e Lider real di iglesia durante momentunan di prueba. Pero esaki no mester ta e kaso.

### Lès no. 7: Nos mester konfia Dios Su boluntat kompletamente den nos bida

Pa nos, Kristiannan, nos mester konfia Dios Su boluntat kompletamente den nos bida. Sí, ta bèrdat, tin momentunan ora ku nos no por komprondé ta pakiko nos ta pasa dor di diferente problema den bida. Pero nos por tin e konfiansa ku Dios Su boluntat ta perfekto, i si nos ke kualke kos den e bida aki, e mester ta Dios Su boluntat.

### Lès no. 8: Nos mester ta dispuesto pa siña

Fiel na su yamada, Pedro a biba pa ta un disipel, un pa siña, un alumno di Hesus. Nos ta lesa for di Beibel e diferente okashonnan ora ku Pedro tabata ansioso pa siña. Komo Kristian, nos mester tin un aktitut humilde, pa siña. Tur dia mester siña, i nos ta hasi esaki mas mihó dor di estudio di Beibel, asistí na servisionan di iglesia, i lesa mas di Dios Su forma di biba.

### Lès no. 9: Nos mester biba pa medio di fe i no bista

Pedro ta un hòmer di kurashi. Pa motibu di esaki, parse ku semper ta e ta bosero pa e otro disipelnan. Sinembargo, tin biaha, *mésun kurashi ta hink'é den problema*. E kier a bin serka Hesus, algu ku nos tambe mester anhelá. Sinembargo, no ta semper fásil pa biba e bida Kristian òf e no ta un bida sin problema. Ta di spera ku nos lo enfrentá hopi problema i desafionan riba kaminda.

Nos ta lesa di Skritura ku Pedro tabata for di Betsaida. E tabata un piskadó riba e Laman di Galilea. Nòmber di su tata tabata Jona. Sinembargo, nan no ta mensioná nòmber di su mama. Tabata su ruman mas chikí Andres ku a trese Pedro serka e Mesias.

Ora bo wak Pedro, no tin nada spesial ku su apariensia. Hende tabata asta tum'é komo un hende sin edukashon òf kualifikashon (Echonan 4:13). Pedro tabata kasá promé ku el a bira un apòstel. E ta generalmente konosí komo e disipel ku a nenga Hesus (òf Yashua na Hebreo) mas ku un biaha. No esei so, pero Hesus a koregí Pedro severamente mas ku qualke un di e otro disipelnan

Sinembargo, Pedro su kombershon despues di Hesus Su resurekshon ta entre esnan di mas dramátiko i poderoso. Riba e dia di Pèntekòste, Pedro a duna un mensahe konmovedor i inspirador. Huntu ku esfuerso di e otro apòstelnan i siguidónan di Kristu, e iglesia tabata krese dia pa dia.

## ALGUN LÈSNAN FOR DI SU BIDA

### Lès no. 1: Ora Hesus yama, nos tin ku respondé inmediatamente

Pedro i mayoria di e otro apòstelnan tabata piskadó. Nan a pasa tempu konsiderabel luchando pa mantené nan mes. Asina, ora ku Hesus a yama nan, tabata durante nan ora di trabou. Nos ta lesa: "I Hesus kanando kantu di e Laman di Galilea, a mira dos ruman hòmer, Simon yamá Pedro, i Andres su ruman, ta tira nèt den laman; pasobra nan tabata piskadó. Despues El a bisa nan, '**SIGUI MI**, i lo Mi hasi boso piskadó di hende.' *Nan inmediatamente a laga nan reda i a siguiÉ...*" **Dios tin un propósito den bo bida...** E pregunta ta awor, "lo bo ke kontestá Hesus Su invitashon?"

### Lès no. 2: Dios ke desaroyá Un relashon será ku nos

Ta ku ki propósito Hesus a yama Pedro? Pa hasié un katibu? Pa simplemente us'é komo un instrument pa kumpli ku Su propósito? Opviamente nò. Ora Hesus a bisa, "Sigui Mi," *E tabata invitá Pedro pa biba mas serka di djE*. Hesus tabata ke pa Pedro siña konosé mas mihó. E tabata kier tin un relashon será kuné i esei tabata posibel solamente segun Pedro tabata pasa mas i mas tempu huntu ku Hesus.

Pa por hala mas serka di Dios i di Hesus, abo tambe tin ku tuma e tempu i esfuerso pa konstruí riba e relashon ei. No ta sufisiente pa djis kere so den Dios, pero bo mester tuma e stapnan nesario pa move hala mas serka di djE.

Na prinsipio, Pedro tabata por a kana riba laman, ku ta un tremendo hazaña ku nos lo por a eksperiensjá tambe spiritualmente ora nos a disidi pa sigui Kristu na komienso.

Sinembargo, Pedro su atenshon a kita bai na e bientu fuerte ku tabata supla. Den mésun forma nos atenshon por kita for di Kristu pa wak e tormentanan di bida rònt di nos. Problemanan ta un parti normal di bida. Pero ora nos kuminsá haña miedu, meskos ku Pedro, *nos ta kuminsá senk*. Kiko a pasa? Pedro a kana pa medio di bista i no pa medio di fe. Nos tin ku kòrda ku e kosnan ku nos no ta mira ta mas **poderoso** ku e kosnan ku nos ta mira. Den e bida aki, nos tin ku realisá ku pa mira no ta pa kere, pero pa kere ta pa mira.

Kana pa medio di fe ta nifiká ku no importá kiko pasa den e bida aki, nunka nos no mester pèrdè nos fe. Ounke nos pèrdè nos kas, e rèspèt i amor di otronan, e rekonosementu di otro hende, i asta nos bida, nos NO mester pèrdè nos fe.

### Lès 10: Nos arepentimentu mester bin ku akshon

Pedro ta konosí komo e disipel ku a nenga Hesus tres biaha. Ora Hesus a predesí su morto, Pedro a bisa, “Maske tur sobrá pèrdè konfiansa den Bo i bandoná Bo, ami sí lo no hasié.” (Mat. 26:23). Pero ora e momentu di prueba a yega,


Pedro a nenga Hesus no ún biaha pero tres biaha! Despues ku Pedro a realisá kon el a traishoná su Maestro, “el a bai pafó i a yora amargamente.” (Mateo 26:75).

No tin duda: Pedro tabata yen di duele i el a arepentí. Nos tur por sinti duele, lamentá nos akshonnan, i yora kuantu ku nos ke. Pero si esaki no kambia nos forma di pensa i afektá nos bida, e ora ei e ta inútil. (2 Korintionan 7:9-11).

Den poko palabra, arepentimentu ta mas ku sinti duele, pero e ta e proseso di pidi pordon i ta komprometé pa bira bai for di e piká ei. I ta esei Pedro a hasi. Manera nos por mira, Pedro no ta perfekto, pero su bida ta un gran fuente di lèsnan ku nos mester apliká den nos bida diario. El a hasi hopi fout ora e tabata huntu ku Kristu, i ainda despues di morto di su Maestro. Sinembargo, manera nos por mira, apesar di e ekibokashonnan aki, Dios a usa Pedro den asina hopi forma poderoso. Si Dios por usa PEDRO, E por usa nos tambe.

---

[10 Powerful Lessons We Learn from the Life of the Apostle Peter | Becoming Christians](#)



**“Pero nunca el a pordoná su mes. Ni e pensamentu di e agonia di e último esena teribel por a mengua e amargura di su duele i arepentimentu. Komo un último fabor, el a pidi esnan ku tabata bai klab’è na e krus pa pone kabes abou. Nan a komplasé su petishon, i den e forma aki e gran apòstel Pedro a muri.” AA538**

**BLOKI PA**

**KONSTRUIE**

**KARAKTER**



## ASINA NO PÈRDÈ NI UN MINÛT PA BO KONSTRUÍ RIBA LOKE A DUNA BO: <sup>1</sup>

- Komplimentá bo fe básiko ku bon karakter
  - Ku kompromedentu spiritual
  - Ku disiplina alerta
  - Ku pasenshi apashoná
  - Ku maravia reverente
  - Ku amistad kaluroso
  - Ku amor generoso
- 
- Kada dimenshon ta pas i ta desaroyá e otronan.
  - Ku e kualidatnan aki aktivo i kresiendo den boso bida, ningun yerba lo krese bou di boso pia.
  - Ningun dia lo pasa bai sin su rekompensa segun abo ta MADURÁ den bo eksperensia ku nos Maestro Hesus.
  - Sin e diferente kualidatnan aki bo no por mira bon kiko tin dilanti bo kara.
  - Ta ignorá ku bo bida bieu di piká a ser kitá for di e bukinan.
- 
- ASINA AMIGU(A), YU DI PASTOR, konfirmá Dios Su invitashon na bo, sa ku El a skohe bo.
  - No laga pa despues, hasié awor.
  - Hasi esaki, i lo bo pone bo pia riba suela sigur.
  - Padilanti tin e kayanan furá i kaminda hanchu habrí pa e reino eterno di nos Maestro i nos Salbador, Kristu Hesus.

## KUATER LÈS NOS TA SIÑA FOR DI E VERSÍKULONAN DI E BUKINAN DI PEDRO: <sup>2</sup>

- 1. Dios lo usa nos despues di nos frakaso.**  
Ningun di nos ta perfekto. Nos tur ta hasi fout, nos tur tin nos debilidatnan. “...i Mi no ta kore ku niun hende ku bini serka Mi.” (Huan 6:37).
- 2. Dios ta anhelá madures spiritual for di nos.**  
Meskos ku un mucha ta krese tiki tiki, pero sigur, pa bira adulto, nos tambe tiki tiki mester krese den madures den nos relashon ku Dios.
- 3. Kristu Su siguidónan lo sufri.**  
Nos mester kambia nos forma di pensa. Di akuerdo ku [1 Pedro 4:12-19](#), nos mester mira nos pruebanan komo oportunidatnan pa nos demostrá goso. Nos por partisipá den Kristu Su sufrimentunan. I pa motibu di esaki, nos lo por gosa di Su bendishonnan tambe.

Nos lo tin un eternidat pa biba den Su presensia. Un eternidat di niun doló òf ferdrit. Nos mester dediká nos mes na nos Kreador i sigui hasi loke ta bon” ([1 Pedro 4:19](#)), miéntras ku nos ta wak padilanti na nos futuro glorioso.

## 4. Kristu Su siguidónan mester biba bidanan santu i deboto.

Pedro ta puntra, “ki sorto di hende boso mester ta?” E ta kontestá dor di bisa “kon santu i dediká na Dios boso bida lo no mester ta!” ([2 Pedro 3:11](#)). Hopi di boso ta bisando, “Klaro, nos mester!” “Pero, realmente, nos ta? Bo bida ta mustra diferente for di promé ora ku bo no tabata konosé Kristu komo bo Salbador?... Si bo ta maraviá si bo bida mester kambia, pidi Dios mustra bo e arianan ku E ke mira kambiá. E ta e Guia supremo i lo prepará bo pa un “shelu nobo i tera nobo, kaminda hustisia ta reina” ([2 Pedro 3:13](#)). Un kaminda nos lo reina huntu ku nos Señor.



**“Manera un flor ta bira den direkshon di solo, pa e rayonan briante por mishi kuné ku tononan di beyesa, asina e alma tambe lo bira den direkshon di e Solo di Hustisia, pa shelu su lus por hasi e KARAKTER bunita ku e grasianan di e karakter di Kristu.” (DA 468)**

<sup>1</sup> Tekstonan for di 2 Pedro I-II (Vershon di Beibel The Message)

<sup>2</sup> [1 Peter and 2 Peter - 4 Powerful Life Lessons from These Bible Books \(crosswalk.com\)](#)



**LESNAN KU TA SINA  
FOR DI UN HOMBER KORTIKU**

E storia di Zacchaeus ta un registro kòrtiku pero importante di e forma kon nos mester aserká i respondé na Kristu Hesus. Ata aki djesun lès ku nos por siña for di e historia aki ([Lukas 19:1-10](#)).

### #1 Ningun Hende ta Fuera di Alkanse di Salbashon

Ta bisa nos ku Zacchaeus tabata un kobradó di belasting riku ([Lukas 19:2](#)). Komprondiendo kon el a yega te asina leu, ta krítiko pa kapta gravedat di e asunto aki. Kobradónan di belasting tabata hende odiá pa e Hudiunan. Nan tabata agentenan di e Emperio Romano, kobrando impuesto pa Caesar. Nan tabatin amplio oportunidat pa kastigá esnan ku no paga i tabata por a oumentá nan entrada mas aya di loke tabata rekerí realmente, basta Roma risibí e sèn ku e mester haña. Siendo un di e hòmbenan ei, Zacchaeus a akumulá gran kantidat di rikesa ilegalmente. E echo ku e tabata un Huidiu ta hasi e traishon dòbel: no solamente e ta abusando di su paisanonan, pero e ta hasi esei komo un hende ku ta profesá lealtat na e gobièrnu Romano dor di su akshonnan. E no tabata mas mihó ku un traidó i disidente. Pero pronto Hesus lo akclará e asunto ku asta un hòmber asin'aki por keda salvá.

### #2 Hasi Tur Loke Por Pa Yega Serka di Hesus

Hòmbenan Huidiu no ta kore pasobra e ta mustra falta di dignidat, i nunca nan lo subi un palu pasobra nan ta keda eksponí na esnan ku ta pasa bou di nan. Lo konsiderá akshonnan asina komo bergonsoso i bou di nivel di un miembro respetá di komunidat. Pero ora Zacchaeus a tende ku Hesus tabata biniendo, el a kore bai dilanti di un multitud i a subi den un palu djis pa e por wak E ([Lukas 19:4](#)). El a hasi loke tabata nesario pa yega serka di Dios, apesar di loke otronan ta pensa.



### #3 Skucha pa Hesus Su Stèm i Respondé

Hesus a papia dirèkt ku Zacchaeus i a bis'é loke E tabata spera di dje ([Lukas 19:5](#)), i Zacchaeus “a hasi purá i a bin abou,” regosihando ku Hesus a pone atenshon na dje ([Lukas 19:6](#)) i a hasi tur loke tabata den su poder pa obedes'É.

### #4 Sea Kla pa Duna Hesus Bon Biní den Bo Kurason

Zacchaeus a demostrá ku e tabata kla pa tende Hesus dor di su akshonnan: sin duda e lo tin ku bandoná su mesanan di impuesto, su estilo di bida i un símbolo di ganashi risibí dor di distorshon, pa e por hala serka di Hesus. El a kibra ku tur norma sosial pa e yega serka di djE, i ora ku Hesus finalmente a papia kuné, Zacchaeus a respondé inmediateamente. Ya su mente i kurason tabata prepará kaba for di padilanti i kla pa respondé ora Señor yama. Nos mes tin ku siña adoptá e forma ei di pensa i tuma e aktitut ei pa ku Hesus.



## #5 Sea Prepará pa Konfrontá bo Prehuisianan

Por siña for di reakshon di e multitud rònt di Hesus. Nan a papia malu di Hesus pasobra El a skohe pa kome ku un hende ku nan ta pensa ta un pekador (Lukas 19:7). Nan tabata menospresi'é pasobra nan a pensa ku no tin salbashon p'é – el a hasi su eskohonan i a bira su lomba pa su pueblo, i asina nan a nenga di buska bon p'é, pa nan mes purba alkans'é. Hopi biaha Hesus a kibra dor di tur dos e bareranan ei. El a konfrontá hende su prekonsepto tokante “pekador” dor di bisa ku ta nan El a bin buska pa salba i a ministrá na dje. E siguiente biaha ku bo pensa ku un hende no ta digno, ku e ta inestimabel i no por salb'é, kòrda e storia aki i e ehèmpel di Hesus. Ningun hende ta for di alkansé di Su man pa redemí.

## #6 Rekonosé Hesus tantu komo Señor i Salvador

Zacchaeus ta dirigí su mes na Hesus komo “Señor” (Lukas 19:8) ora el a papia kunÉ. Esaki ta e promé stap krítiko pa kuminsá un relashon ku Dios: rekonosé Hesus komo e Señor di bo bida. Niun otro hende òf kos òf prioridat mester yega serka di e influensia i dominio di Kristu Hesus. Sí, ta bèrdat ku E ta salba nos, pero e punto di Su salbashon ta ku nos por usa nos bidanan redemí i restourá pa laga E manda riba nos.

## #7 Hasi Tur Loke Bo Por pa Mehorá Bo Bida

Zacchaeus ta primintí pa tuma medidanan drástiko pa drecha e malu ku el a hasi, i pa biba den un forma mas hustu i korekto: e ta primintí di duna hopi di su rikesa na e pobernan i hasi èkstra pa paga bèk loke el a kita ilegalmente for di e hendenan (Lukas 19:8). Akshonnan asina lo a mengua, kisas kaba mes ku tur e rikesa di Zacchaeus. Kisas el a keda sin nada ora el a kaba, pero e no tabatin kunes. Tur loke e tabata ke ta pa sigui su Señor. Por fin el a drecha su prioridatnan; ya sèn no tabata loke tabata motiv'é mas den bida. E por a dun'é ku alegria pa por sigui Hesus.

## #8 Someté na Loke Dios Pone Riba bo Kurason

Kisas no ta yama nos partisipá na mes nivel di ekstrabagansia den nos duna manera Zacchaeus, pero ki ora ku Dios pone un kaminda òf un akshon riba bo kurason pa bo sigui, no kompará esaki ku otro hende, pa purba hustifiká algu ménos pisá. Nos kada un tin di skohe pa nos mes; nos por buska konseho sabí i konsiderá tur loke nos akshon ta enserá, i ser sigur si tal sintimentu ta bini for di Dios òf ta nos mes pensamentu. Pero e punto klave ta, nos mester ta obedesidu na tur loke Dios bisa nos hasi pa por siguiÉ. Zacchaeus tabata moví dor di Hesus Su amor pa hasi e kosnan ku el a primintí. Pa e nan tabata stapnan nesario pa proba ku el a dediká restu di su bida kompletamente na Dios.



## #9 Fe i Akshon ta Diferente, Pero Nan ta Traha Huntu

Zacchaeus no por a keda hustifiká dor di simplemente regalá su sèn. I e no por a keda hustifiká tampoko dor di tuma kualke otro akshon. Esakinan tabata señalnan eksterno di un kurason ku a kambia. Skritura ta siña un otro kaminda ku e motivashonnan di nos kurason ta loke ta konta, no djis akshonnan. Nos por obedesé kada lèter di lei, òf marka afirmativamente kada hòki ku ta indiká na otronan ku nos ta fiel disipel di Kristu. *Pero si nos ta hasi tur e kosnan aki ku deseo i motivashonnan egoista, a lo largo no ta sirbi nos di nada.* Nos obranan no ta salba nos; solamente FE DEN DIOS ta hasi esei. Pero un manera ku nos por ta sigur ku nos fe ta real ta pa sigui su tras ku— nos akshonnan. Nos bon obranan ta un señal di fe, no un porta pa yega na dje.



## #10 Ser Dispuesto Pa Aseptá Otro Kreyentenan

Despues di Su reunion ku Zacchaeus, Hesus a bisa ku e tabata un “yu di Abraham” (Lukas 19:9) i a bisa ku Zacchaeus su fe a salv’é. Hesus tabata sa kua tabata e deseonan di Zacchaeus su kurason, i E tabata sa ku e lo bai kambia realmente— E sa mésun kos di nos tambe. Si nos topa un hende ku anteriormente nos a pensa no tin salbashon p’è, i nan demostrá prueba di arepentimentu berdadero i di salbashon, nos mester ta lihé pa aseptá nan riba evidencia di nan bida ku a kambia.

## #11 Kòrda Pakiko Hesus A Bini

Hesus a bisa atrobe e propósito pa Su ministerio: “Yu di hende a bini pa buska i salba esun ku ta pèrdi” (Lukas 19:10). Nos tin ku kòrda esaki den nos mes ministerio personal pa Dios, i tin esaki komo nos meta di guia pa kumpli ku e Gran Komishon.



# DISIPLINA DEN UN KAREDA DI DISTANSIA LARGU

**BO TA MIRA KIKO ESAKI TA NIFIKÁ**— tur e pioneronan ku a habri e kaminda, tur e veteranonan ei (Heb. 11) ta animá nos pa sigui dilanti? Esei ta nifiká ku mihó nos hasi esfuerso i sigui. Kita paña pisá, kuminsá kore— i nunca stòp. Niun vèt spiritual èkstra, niun piká parásito. Mantené bo wowonan riba HESUS, ku tantu a kuminsá i a terminá e kareda aki ku nos ta den dje. Studia kon El a hasié. Pasobra nunca El a pèrdè di bista na unda E tabata bayendo — e final emoshonante ei den i ku Dios— e por a soportá qualke kos kantu di kaminda: krus, bèrgwensa, loke sea. I awor e ta einan, den e lugá di honor, banda di Dios.

Ora bo ta haña bo ta flakia den bo mes, repasá e historia ei atrobe, pida pa pida, e kaminda largu ei di hostilidat ku El a plug pasa dor di dje. *Esei* lo manda adrenalina den bo alma!

Den e pelea hopi grandi aki kontra piká, otronan a sufri pió ku bo, pa no bisa nada di loke Hesus a pasa dor di dje— tur e sangramentu ei! Asina no sinti duele pa bo mes. Òf bo a lubidá kon bon mayornan ta trata nan yunan, i ku Dios ta konsiderá boso Su yunan?

**Mi yu stimá, no sakudí bo kurpa i benta Dios Su disiplina afó.  
Pero no keda aplastá tampoko dor di dje.  
Ta e yu ku E ta stima E ta discipliná;  
E yu ku e ta brasa, e tambe E ta koregí.**

Dios ta edukando bo; ta p'esei nunca bo mester kai afó. E ta trata boso komo Su yunan stimá. E problema aki ku bo ta aden no ta kastigu; e ta *entrenamentu*, e eksperensia normal di muchanan. Ta solamente mayornan irresponsabel ta laga nan yunan pa nan kuenta. Bo ta preferá tin un Dios irresponsabel? Nos ta respetá nos mes mayornan pa entrená i no malkriá nos, asina pakiko no brasa Dios Su entrenamentu pa e ora ei nos *biba di bèrdat*?




Tempu nos tabata mucha, nos mayornan a hasi loke tabata *parse* nan mas mihó pa nan. Pero Dios ta hasiendo loke ta mas mihó pa nos, entrenando nos pa biba e mihó bida pa Dios. Na e momentu aki disiplina no ta dushi. Semper *parse* ku e ta veila nos robes. Mas despues, klaro, e ta duna hopi bon fruta, pasobra ta esnan bon entrená ta mira ku nan a *madurá* den nan relashon ku Dios.

*Asina no kai sinta riba bo mannan!* No lastra pia mas! Prepará kaminda pa koredónan di distansia largu pa niun hende trompeká i kai, pa ningun hende stap den un hoyo i trose su ènkel. Boso un yuda otro. I KORE!!!! Traha pa drecha boso relashon ku otro i ku Dios. Sino boso no ta haña chèns pa mira ni un pida di Dios. Sigurá pa ningun hende keda pafó di Dios Su generosidat. Paga tinu riba yerba shimaron di malkontentu amargo. Si simia di un sumpiña òf dos kai den tera e ta destruí henter kunuku den un fregá di wowo.



**Tene kuidou ku sindrom di Esau: negoshando Dios Su regalú di henter un bida pa por satisfasé apetit di djis un ratu. Bo sabi bon kon despues Esau a lamentá e akto impulsivo ei i tabata ke Dios Su bendishon—pero awor tabata muchu lat, ku òf sin lágrima.**



“Ami no sabi di bo, pero mi ta kore duru pa e liña final. Mi ta duna tur loke mi tin. Niun bibamentu pa loko pa mi! Mi ta bai keda alerta i den bon kondishon. No ta bin haña mi ta kabishá, ta konta tur hende boka yen di dje i despues ami mes ta keda deskualifiká.”<sup>2</sup>



<sup>1</sup> Hebreonan 12, vershon The Message

<sup>2</sup> 1 Korintionan 9:27

ADVENTIST HERITAGE LIBRARY



# MR. CREATOR'S Borrowed BROWN HANDS



YVONNE DAVY

### 3. Sientífiko Pia Abou

No tin niun pida papel rònt den e hogar Carver ku por usa, asina George no a pensa mes pa pinta kuadronan asina. Mas bien el a bin haña un piedra lisu, plat i algun bèri di koló, i ku esakinan el a bin pinta su promé kuadro. Ora el a kaba, el a hala un tiki patras pa revisá su arte.

“Esei no ta mes bon ku e kuadronan na e kas grandi,” el a atmití pa su mes, “pero nan ta parse flor. Algun dia mi ta bai pinta kuadronan mes bunita ku esnan di Sra. Baynham. I nan ta bai kologá na muraya di kasnan bunita tambe,” el a primintí su mes.

Si e mucha su bishita na e plantashi Baynham a dun’é un vishon, el a duna Sra. Baynham mes tantu motibu pa regosihá. Su rosanan tabata rival di esnan di Tanta Susan di bunita ku nan ta.

“Oh, ki bunita rosanan bo tin, tabata e sklama-shon ku e ta tende ki ora ku su bisñanan pasa ei banda pa hasi un bishita.

“Ah, mi no por tuma krédito pa nan. Ta danki na Mr. Carver su George. E ta e sabio real ku mi matanan.” Sra. Baynham tabata hopi lihé pa duna George e krédito.

I asina George su fama a krese, i ki ora un di e señoreanan den e aria tin un problema ku nan matanan, nan ta puntra si George por bin yuda nan. I kada dia George ta siña mas di matanan segun e ta hasi deskubrimientunan den su hòspital di mata den mondi.

Un dia Tio Moses a kana bin tur disgustá i ferdrit den kushina. “Parse ku mi mihó palu di apel ta muriendo,” el a bisa Tanta Susan.

“Oh, no, no bisa mi e kos ei! Kon mi ta traha tèrt di apel? I apelmus? Si e palu ei muri\_\_\_” Tanta Susan su stèm a manera bai leu.

“Wèl, mi no por mira ku tin nada malu kuné, eksepto e ta muriendo. Bin i wak e pa bo mes,” el a sugerí.

Tanta Susan i Jim a sali purá pa bai den hòfi kuné, pero George a kore bai nan dilanti. Segun el a hisa kara wak e palu ku di bèrdat tabata muriendo, George a kuminsá subi riba e tronkon di palu. El a pasa di rama pa rama.

“Abo baha abou awor aki; bo no ta un makaku,” Tanta Susan a komandá ansiosamente.

“Mi ta bin un djis, Tanta S-Susan. Tio Moses, Tio Moses, buska un zag!” e mucha a grita eksitá den su stèm haltu.

“Pakiko bo mester di un zag?” e hòmber a puntra.

“P-Paso— mi sa kiko ta robes ku e p-palu. M-mester kòrta e rama aki kita afó, i e palu lo ta bon atrobe. Mi a haña nèshi di un m-mòt den e rama aki i ta esei ta mata e palu.”

Tio Moses a manda Jim bai buska e zag, i den un ratí ora e rama pèstá tabata bentá abou na suela. Segun nan a keda wak e rama tur dañá Tio Moses a djis sakudí su kabes segun e tabata bisa

bes tras bes, “No tin nada ku George no sa.”

George, sinembargo, no tabatin un opinion asina eksaltá di su mes konosementu. En realidat ta parse komo si fuera mundu ta yen di kosnan ku e no tabata sa. Kon haña tur e kontestanan pa su preguntanan— esei ta e problema real. Tio Moses i Tanta Susan kontinuamente ta keda tur konfundí.

“Di kon bo no ta manera Jim?” Tio Moses ke sa. “Jim nunca ta hasi pregunta ku mi no por kontestá. E ta chapi, harpa, kuida pa e kabainan, i e ta satisfecho; pero abo, semper ke sa ‘Pakiko bo ta hasi esaki? Kon pampuna ta krese? For di unda muskita ta bini?... Bo ta kaba ku mi ku tur bo preguntanan.” I Tio Moses ta djis sakudí su kabes ku frustrashon.

Pasobra niun hende por duna George kontesta pa su preguntanan, e ta purba haña e kontestanan pa su mes.

“Ta kiko e kos ei ku bo tin den bo man?” Tanta Susan a puntra George segun el a kana dreña un atardi den kas.

“E ta solamente un r-raton chikí. Mi ke haña s-sa kon—”

“Kiko!” Tanta Susan no a lag’é kaba ku su frase.

“Pafó!” el a komandá, anto ora e usa e stèm ei, George sa mihó e no pusta boka òf purba splika. Asina e raton a bai pafó. Pero ora e tabata bin bèk, el a mira e bunita flor delikado ei ku yama *Queen Anne’s lace*, anto riba un tabatin un bichi gordo ku lo bira barbulètè despues. Ah, ata un kos akinan ku e por studia. El a kohe un man yen di e flornan i a pone nan den un vas riba mesa.

“Esei ta bunita,” Tanta Susan a bisa ora el a mira e bukèt. “Danki, George.”

George a smail felis. Sinembargo, Tanta Susan a ripará ku e tabata mustra hopi interes na e vas riba mesa. Ta manera e ta papia ku su mes segun e ta keda wak e.

“Pakiko bo ta asina interesá den e flornan ei?” el a puntra.

“E ta asina b-bunita. M-mi gusta w-wak—” Su stèm tabata zona basta inosente.

“Tin algu ku no ta bon. Bo ta gaga muchu.” I Tanta Susan a kana bai na e mesa.

“E ta n-nada m-masha—”

Pero no por despistá Tanta Susan asina lihé. E mes a keda studia e flornan un ratu. Na prinsipio el a pensa ku lo e ta kibuká; i segun e tabata bira bai, el a mira e “bichi.”

“Pafó! Anto lihé! El a komandá.

“P-pero—”

“Nada di ‘pero.’ ‘Hiba e flornan ei pafó— i no trese mas flor den kas!’”

Un dia George a trese algun stèngel haltu di baliña. E kier a mira kon nan ta habri. El a pone nan riba mesa. “Nan no ta flor, djis baliña, i no tin b-bichi na nan, Tanta Susan,” George a supliká.

Tanta Susan a debilitá. “pa e biah’aki— pero si bo mester susha, bo ta den problema yònkuman.”

“Nan no ta susha,” George a primintí.

I su intenshon tabata hopi bon. Pero e mihó intenshonnan no ta sali semper bon. George a yuda Tanta Susan bati e krema pa traha manteka. A lab'é i ainda e tabata den un tayo hundu riba mesa di kushina— un isla grandi koló di oro rondoná pa awa kla i friu. E mester a hiba e manteka pa ward'é den kamber di lechi, pero el a kore bai pafó algun minüt. I Tanta Susan tabata drei e djèm kòrà di apel segun e tabata kushiná riba stof.

Un gritu di horror for di Tanta Susan a trese George na kareda pa bin reskat'é, òf asina el a pensa, te ora el a mira loke a pasa. El a keda para paralisá pa loke su wowonan tabata mira. E baliñanan tabata bula habri un tras di otro i e simianan di parashut tabata nabegá riba kada korieño di airu ku tabata bini for di e bentana.

Finalmente el a haña su stèm. “Oh, e ta b-bbuni-ta!” el a bisa ku un suspiro solèm.

Desafortunadamente, Tanta Susan su wowonan no tabata mira e beyesa di e parashutnan ei di seda. Na lugá di esei el a keda wak kon nan a susha flur segun nan tabata bin kai abou for di laira, riba meubel, i pió, mas pió—

“Wak mi manteka! I mi djèm!” el a sklama. “Moses, Moses Carver, bin akinan i hiba e mucha aki mesora na e stal,” el a komandá den su stèm hopi severo, ku no ta hasi wegá.

Tio Moses a bini purá for di e kabainan pa wak ta ki krimen horibel George a hasi. George a kana bai pafó pa top'é, i nan dos a kana bai na e stal. Riba kaminda Tio Moses a para un ratu pa kibra un taki— solamente un taki delegá— pasobra George tabata un mucha chikí.

“Baha e karson ei, mucha hòmber. Nos tin ku hasi loke Tanta Susan a bisa,” el a papia ku e mucha.

Obedesido George a baha su karson, turesten e tabata bon bisa, “Oh, Tio Moses, bo mester a m-mir'é, bo mester a mir'é.”

Zing, zing, zing, e rama tabata suta, pero e no tabata stòp tur George su sklamashon di maravia. “Oh, Tio M-Moses bo mester a wak e.” Segun e hòmber a benta e taki un banda, a lo largo el a bai di akuerdo. “Mi ta kere lo tabata bon pa mi a wak e, ya ku djis kòrdando riba e kos ei a kita tur doló di bo straf for di bo. Pero mi ta kere tambe ku mihó bo no hasi e kos ei mas!”

George tabatin masha gana pa e tin un sambèchi, pero no tabatin sèn pa kosnan asina di luho. Asina el a bisa e flornan den su hardin, “Mi mester di un kuchuw pa mi traha tur sorto di kos pa Tio Moses, Tanta Susan, i pa Jim. Pero Tio M-Moses ta bisa e ta djis un ko'i hunga, asina mi ta k-kere mi ta pidi Sr. Kreador manda un sambèchi pa mi. Tanta S-Susan a konta nos un b-bunita storia di un hòmber ku a r-resa i el a haña loke el a pidi, asina di kon ami no por hasié?” I asina el a bisa Dios tur kos tokante su deseo, i e anochi ei e tabatin un soño emoshonante. Den un kunuku el a mira tres stèngel den un kunuku ku un patia mitar-komí ei



banda i banda di e patia tabatin un sambèchi di hende muhé ku man pretu i dos blet.

“Mi ta bai buska un sambèchi awe,” el a anunsiá na desayuno.

“Anto ta na unda bo ta bai hañ'é?” Jim sképtiko a puntra.

“Djis warda i lo bo wak,” George a kontestá misteriosamente.

Tan pronto ku el a kaba di yuda ku e tayonan, el a puntra, “Mi por bai i buska mi sambèchi a-awor? Mi'n ta tarda.”

“Mi ta kere bo por,” Tanta Susan a konsentí.

George a sali purá pa bai na e kunuku den su soño, i sigur sigur, ata e tres stèngelnan ei ku un patia mitar komí riba suela banda di nan. El a pasa su man den e yerbanan rònt buskando. Diripiente su dedenan a sera riba un kos duru. El a sak'é afó. Tabata e sambèchi. “Sr. Kreador, mi tabata sa ku lo bo duna mi un sambèchi si mi pidi Bo. Danki pa stima mi hopi,” el a bisa suavemente.

Ounke Tio Moses tabata un bon hende, segun normanan di mundu— e no tabata papia palabra malu, e tabata hopi honesto, i e tabata kere un tiki den Dios— e no tabata bai misa. George, na e otro banda lo a gusta pa bai na e misa kabina chikí na Locust Grove, un mia for di nan kas. Pero ya ku su “famia” no ta bai misa, klaro, e tambe tabata keda kas. Pero den siman tabata diferente pasobra nan

tabata troka e kabina den un klas di skol. Hopi biaha George tabata kore bai i kai sinta riba trapi di e edifisio pa skucha segun e muchanan tabata resitá nan lèsnan pa e maestra.

“Hmmm, mi ta kere mi por siña mes bon ku e muchanan ei,” el a bisa na su mes. “Mi mester papia ku Tio Moses di esaki.” I el a kore bai buska Moses Carver.

“Tio M-Moses, ki dia mi ta s-sufisiente grandi pa bai sk-sk-skol.” el a puntra kasi sin rosea.

Tio Moses no a kontestá; en realidat e tabata parse asina konsentrá riba su trabou ku por ta e no a tende mes. E ta kere ku George ta muchu chikí pa bai skol, meskos ku el a pensa e ta muchu chikí pa bai Neosho? “Tio M-Moses sa, mi ta skucha e muchanan i mi s-sa, mi por hasi e lèsnan meskos ku nan!”

Tio Moses a evadí e pregunta. “Realmente bo no ke bai skol! Bo ta hopi sabí kaba, asina sea satisfecho pa keda rònt akinan manera Jim.”

“N-nò, Tio M-Moses, mi, mi k-ke bai skol, mi ta sigur mi ta b-basta grandi kaba, paso tin mucha mas chikí ku mi na e skol.”

Awor Tio Moses a bira wak George segun e tabata sakudí su kabes poko.

“Nunka lo bo ta sufisiente grandi... pa bai na e skol ei, pasobra no ta laga mucha koló skur bai na e skol ei,” el a bisa tristu.

“P-p-pero di kon nò? Oh!” E desesperashon den George su stèm a trose e hòmbèr su kurason. El a bira lomba abruptamente for di e tragedia ku tabatin skirbí riba henter e mucha su kara.

George a kore bai den mondi pa enfrentá su desapuntamentu su so. Ki diferensia ta hasi ku su kueru ta pretu? Tanta Susan no ta kere ku e ta hasi algun diferensia. E ta bisa ku George por brei i hak i bòrda mes bon ku e mes. El a keda wak su mannan. Nan tabata maron, sí, pero nan por hasi tur e kosnan ku Tanta Susan su mannan blanku por hasi. Tio Moses hopi biaha a pidi su opinion tokante e matanan i palunan i a tuma su konseho, asina Tio Moses no ta haña ku ta hasi niun difereñsia— un kabes pretu por pensa mes bon ku esnan blanku. I e rosanan den Tanta Susan su kurá—Dios ta manda solo i awaseru riba esnan kòrá i tambe esnan hel. Pakiko un mucha hòmbèr no por bai skol pasobra koló di su kueru ta pretu? Nunka lo e haña e kontestanan?

El a tira su mes abou riba suela banda di su hardin chikí i a yora i yora i yora i snek te ora ku el a keda kansá sin forsa.





# KONEKTANDO BO KU DIOS

<https://lifetalk.net/kids-programs/>

